

# Alam Islam

## Alam Islam .. Hari Ini dan Akan Datang

(2)

(Terjemahan penyunting Qalam)

Bagaimana seseorang itu akan dapat dilihat

dari celah-celah awan mendung yang gelap-gelita yang penuh dengan kezaliman itu akan sesuatu segi kebenaran, atau sesuatu tanda bagi kebaikan, yang menjadi dasar tempat tegaknya sesuatu umat dan tempat hidupnya sesuatu bangsa?

Bagaimana seseorang itu akan merasai

sesuatu kesan dari perikemanusiaan dalam masyarakat yang serba mati itu, atau dapat menelah akan hidupnya umat itu kembali dari bawah runtuhan yang bertimbun-timbun itu? Tetapi adakah alam Islam akan tamat riwayatnya dengan kesudahan yang menyedihkan itu? Dan adakah kehidupan itu akan berjalan terus menurut jalannya dengan licinnya setelah lembaran Islam tergolong dan kerajaan Islam hilang lenyap? Umat Islam tidak akan berputus asa daripada pertolongan Allah, kerana menurut undang-undang Allah yang sentiasa berjalan pada makhluknya ialah bahawa Allah Ta'ālā meninggikan (seseorang atau sesuatu umat) dan menurunkannya. Demikianlah hikmah Allah dalam kehidupan berjalan terus-menerus, tidak ada sesuatu keadaan yang kekal selama-lamanya, sebagaimana firman Allah Ta'ālā di dalam kitab suci *al-Qur'ān*

*al-Karīm*:

*Awalam yaraw annā nasūqu al-mā'a ilā al-arḍi al-juruzi*

*fa nukhriju bihi zar'an ta'kulu minhu an'āmuhum wa anfusuhum, afalā yubṣirūn?* (al-Sajdah, 27).

Ertinya: Dan tidakkah mereka melihat bahawasanya kami mengalirkan air kepada bumi yang kering, lalu kami tumbuhkan dengan air itu tumbuh-tumbuhan yang boleh dimakan oleh binatang-binatang ternak mereka dan mereka sendiri, apakah mereka tidak melihatnya?

### Umat Islam bangun kembali

Demikianlah belas kasihan dan limpah kurnia Allah yang telah dilimpahkan-Nya kepada umat Islam, lalu dilimpahkan kepada mereka rahmat-Nya yang telah menghidupkan roh dan semangat baharu di dalam diri mereka, sehingga mereka berjaya melenyapkan penjajahan, dan mulailah umat-umat Islam lepas bebas dari penjara penjajahan yang terkutuk itu, dan merdeka dari belenggunya, lepas satu umat, satu umat pula. Tanda-tanda yang menunjukkan jalan kejayaan mulai terlihat kepada masyarakat umat Islam sejagat, dan rasa kesedaran yang besar mulai pula menjalar di dalam alam Islam yang luas itu untuk mengatur dan membentuknya.

Ketika tamat peperangan dunia yang pertama, kuasa penjajahan sedikit demi sedikit mulai lemah, dan

naungannya sedikit demi sedikit mulai lenyap. Peperangan yang tersebut telah menyedarkan semangat dan menyebabkan bangsa-bangsa yang terjajah bangun melawan dan memberontak, dan telah menghidupkan rasa kesedaran mereka, serta mendesak mereka berpaling kepada keadaan mereka yang menyedihkan. Semenjak itu mulai jeritan mereka lantang kedengaran, mereka bertempik di muka penjajahan yang mencero boh itu, dan mulailah perjuangan mereka menentang penjajah bertambah keras dan berlaku terus-menerus. Semenjak itu, bangsa-bangsa yang berjiwa merdeka tidak berlelah lagi daripada memecahkan belenggu penjajahan yang menghina dan memperhamba itu. Mereka memecahkannya satu persatu, dan melontarkan gelang-gelangnya satu persatu.

Hasil kebangkitan ini, banyaklah umat-umat Islam

yang sekian lama dijajah dan ditindas telah dapat membebaskan diri. Sebaik-baik sahaja tamat peperangan dunia yang kedua maka rantai belenggu penjajahan yang akhir, yang masih membelenggu alam Islam telah dapat dipecahkan. Dengan itu maka dunia Islam yang luas itu telah menjadi lepas bebas, dan dapat bergerak dalam lapangan hidup, serta bersungguh-sungguh mengejar angkatan dunia yang serba maju itu.

Dalam pada itu, sudah tentu tiap-tiap umat yang telah bebas dari cengkaman penjajah berkehendakkan suatu masa untuk memperbaiki kelumpuhannya dan menyelesaikan masalah-masalahnya, dan juga untuk mengembalikan kekuatannya yang telah dirompak dan rasa kesedarannya yang telah lenyap. Oleh itu berlalulah suatu peringkat masa,



*Pahlawan-pahlawan kemerdekaan Algeria sedang bersedia dengan senjata di tangan untuk menggempur tentera penjajah*

*Perancis dan membebaskan tanah air mereka yang dikasihi. Tidak lama lagi, bi ḥawli Allāh, alam Islam akan*

*bertambah besar dengan munculnya negara Islam Algeria yang bebas merdeka.*

yang di dalamnya tiap-tiap umat sibuk dengan urusan-urusannya yang khas, menyelesaikan dan memperbaiki hal keadaannya, sehinggalah keadaan berjalan sebagaimana semestinya maka umat itu akan mulai berpaling kepada negara-negara jiran dan saudara-saudaranya, dengan tujuan hendak berhubung dengannya dan mengetahui akan ehwal Islam dan umat Muslimin di dalamnya.

Dengan ini, rasa kesedaran yang bersemangat keislaman mulai meresap dalam jiwa orang-orang Islam seluruhnya, di keempat-empat penjuru dunia, setelah tiap-tiap suatu umat bersemangat dengan secukup-cukupnya dengan semangat kebangsaan dan kewatanan. Tidak ada yang tinggal lagi selain daripada ikatan agama yang am, yang menjadi pegangan hidup umat Islam zaman-berzaman, semenjak zaman Islam yang keemasan, yang di dalamnya umat Islam menjadi tuan di dunia ini dan pemimpin dalam alam kehidupan. Ikatan agama itu ialah ibarat urat darah, yang memberi makan kepada tubuh (dunia Islam) yang besar ini, dan dengan bahan-bahan yang menjadikan dia bertambah kuat dan bertambah tumbuh membesar.

Zaman alam Islam hari ini ialah suatu zaman yang penuh dengan harapan yang besar dan memberi bayangan yang menggembirakan tentang masa cemerlang yang akan datang, kerana alam Islam telah sembuh daripada penyakit-penyakitnya dan sedang menyambut kedatangan masa sihat dan kesegaran.

Cukuplah bagi alam Islam kalau tersingkir daripadanya penyakit-penyakit yang mendatang dan pukulan-pukulan yang datangnya secara mengejut, supaya dengan itu dapat dia menerima kehidupan menurut keadaannya secara tabii. Pada saat

itu akan menjadilah ia suatu masyarakat yang mempunyai sepenuh-penuh kesanggupan berbanding dengan lain-lain masyarakat dunia, yang terhimpun di dalamnya segala anasir-anasir kebaikan, dan yang sehampir-hampirnya kepada kesempurnaan umat manusia. Pada saat itu alam Islam akan menjadilah ia suatu masyarakat yang lebih baik daripada lain-lain masyarakat dunia untuk mengekalkan kehidupan yang baik, dan untuk menyebarkan dasar persaudaraan dan perdamaian di antara umat manusia seluruhnya.

### **Umat-umat yang bertamadun turun-temurun**

Bagaimana masyarakat Islam tidak berdiri menjalankan tugas yang mulia ini dalam alam kehidupan? Dan bagaimana masyarakatnya tidak mewujudkan perkara-perkara yang mulia itu dalam kalangan orang-orang perseorangan dan kumpulan-kumpulannya, sedang ia telah pun memegang tampuk kebesaran dan telah mengambil daripada alam kehidupan akan anasir-anasirnya yang pilihan? Umat-umat yang terlingkung dalam alam Islam ialah umat-umat yang bertamadun turun-temurun, dan mempunyai sejarah kebesaran zaman-berzaman. Umat Islam itu telah menulis akan fasal-fasal yang pertama dalam sejarah umat manusia, dan telah mengambil bahagian yang besar dalam lapangan tamadun di atas muka bumi ini. Adakah sejarah pernah mengenal – dahulu dan sekarang – akan tamadun yang lebih indah dan lebih besar daripada tamadun Mesir, India, Parsi dan negeri China?

Adakah alam manusia pernah melihat akan tanda-tanda kecerdasan dan kebijaksanaan sedemikian sempurnanya, sebagaimana yang telah dilihatnya di dalam negara-negara tua yang tersebut? Maka bagaimana pula halnya umat-umat (yang sedia mempunyai sejarah gemilang) itu sesudah

berbahagia menerima agama Islam dan sehati ajaran-ajarannya  
di dalam daging darahnya?

Nyatalah umat-umat Islam itu ialah anasir-anasir yang mulia,  
yang berupa ibarat tanah yang subur yang menumbuhkan  
tanaman yang subur, yang mendapat makanannya dari pancaran  
hikmah dan ilmu pengetahuan, dan menerima cahaya kebenaran  
dan pertunjuk. Dengan demikian ia sudah tentu akan  
mengeluarkan buah yang lazat citarasanya, yang banyak  
sekali mengandung kebaikan alam manusia dan  
kebahagiaannya. Itulah dia masyarakat Islam yang tuan  
saksikan kebangkitannya, bahkan yang tuan idam-idamkan  
kejayaannya, mendaki dengan gagahnya akan kemuncak

---

**Bacalah!**

**Sudah terbit!**

**Buku-buku Syuhada**

**Disusun oleh:**

**Edrus**

- |                                     |        |
|-------------------------------------|--------|
| 1. Ḥamzah bin ‘Abd al-Muṭalib       | 50 sen |
| 2. Nusaybah – Pahlawan Wanita Islam | 50 ”   |
| 3. ‘Ikrimah bin Abū Jahl            | 50 ”   |
| 4. Sa‘ad bin Rabī‘                  | 50 ”   |
| 5. Sa‘ad bin Muādh                  | 50 ”   |
| 6. Nu‘mān bin Maqran                | 50 ”   |
| 7. Ja‘far bin Abi Talib             | 50 ”   |
| 8. Anak ‘Abd Allāh bin Ubay         | 50 ”   |
| 9. Anak angkat Rasulullah           | 50 ”   |
| 10. Abū Hudhayfah bin ‘Utbah        | 50 ”   |

*Di-terbitkan oleh:*

**QALAM**

356/358 GEYLANG ROAD,

SINGAPORE 14.

---

kebesaran dan kekuasaan.

Angkatan (umat Islam) mulai berjalan ke arah  
tujuannya, ke arah subuh yang cemerlang dan siang hari  
yang terang-benderang. Rasa kesedaran umat Islam mulai  
mengikat alam dunia besar yang ini dan menggegar isinya yang  
baik dan perbendaharaannya yang terpendam dari peninggalan  
zamannya yang telah lalu, untuk membentuk umat yang satu,  
yang hidup atas petunjuk kitab suci *al-Qur’ān*  
*al-Karīm*, dan mencari sara hidup di dalamnya,  
serta bekerja untuk membela kebenaran dan menyebarkannya  
dalam kalangan manusia.

Muktamar Islam yang pertama yang telah disaksikan oleh  
negeri Makkah al-Mukarramah dan telah disaksikan oleh  
orang-orang Islam pada musim haji, pada beberapa tahun  
yang lalu, dan yang telah dihadiri oleh ketua-ketua negara  
dan penganjur-penganjur umat Islam, di Tanah Suci itu, yang  
menjadi tumpuan hati umat Islam, adalah  
menjadi pelopor yang memimpin kemaraan masyarakat  
Islam ke tempat keturunan dan kemuliaan. Dialah juga  
penyeru yang telah memenuhi pendengaran umat Islam dengan  
kebesaran-kebesaran Islam, dan kenangan-kenangan zamannya yang keemasan,  
untuk menguatkan roh kehidupan di dalam diri  
mereka, dan untuk menanamkan azam kepahlawanan dan  
keberanian.

Dengan rasa bangga akan kebesaran-kebesaran yang cemerlang  
yang telah lalu, dan dengan penuh percaya akan masa  
yang akan datang, alam Islam mengangkat kepalanya dan memandang  
ke ufuk kemuliaan, sambil mara dengan derasnya ke arah  
ketinggian dan ketuanan, dengan hati yang penuh dengan  
kebaikan, dengan perasaan kasih sayang kepada umat  
manusia, sambil menyeru kepada persaudaraan dan perdamaian.